


卷之六



喘

短氣

逆氣

少氣

哮喘

逆氣

少氣

經曰諸病喘滿皆屬於熱寒則息遲氣微○欬嗽上
氣厥在胸中過在手陽明太陰○氣有餘則喘欬上
氣不足則息利少氣○肺氣虛則鼻寒不利少氣實
則喘喝胸盈仰息○秋脉不及則令人喘呼吸少氣
○勞則喘息汗出○邪入六府則身熱不得臥上為
喘呼○夜行則喘出於腎溼氣病肺有所墮恐喘出
於肝溼氣害脾有所驚恐喘出於肺溼氣傷心渡水
跌仆喘出於腎與骨○肝脉若搏因血在脇下令人
喘逆○喘欬者是水氣并陽明也○不得卧卧則喘
者是水氣之客也○起居如故而息有音者此肺之

絡脉逆也。○二陽之病發心脾其傳為息賁者死不

治二陽陽明也上不能生金而心火○乳子中風熱

喘鳴肩息者脉實大而緩則生急則死乳子中風熱後

非嬰兒也

戴復菴云有痰喘有氣急喘有胃氣虛喘有火炎上

喘痰喘者凡喘便有痰聲氣急喘者呼吸急促而無

痰聲胃氣虛喘者擡肩擡項喘而不休火炎上喘者

乍進乍退得食則減食已則喘火熾胃中有實火隔

上有稠痰得食下咽墜下稠痰喘即暫止稍久食已

入胃助其溼火痰再升上喘反大作俗不知此作胃

虛治治以燥熱之藥者是以火濟火也

趙養葵曰。喘與短氣分。則短氣是虛喘。是實然喘多。有不足者。短氣間有有餘者。新病亦有本虛者。不可執論也。如實喘者。氣實脈盛。呼吸不利。肺竅壅塞。右寸沉實。宜瀉肺。虛喘者。先覺呼吸氣短。兩脇脹滿。右尺大而虛。宜補腎。此腎虛證。非新病虛者乎。邪喘者。由寒邪伏於肺中。閉竅不通。呼吸不利。若寸沉而緊。此外感也。亦宜六部俱伏者。宜發散。則身熱退而喘定。脈出。此鬱證。人所難知。非短氣中之有餘者乎。○又一等似火非火。似喘非喘者。諸陽氣浮。無所依歸。故上氣而喘也。其人平日若無病。但覺氣喘。非氣喘也。乃氣不歸源也。不知者。以其有火也。誤以涼藥清。

之以其喘急難禁也。又用四磨之類寬之。下咽之後似覺稍寬。少頃依然。豈知寬一分更耗一分矣。惟劑參芪補劑加補骨脂阿膠等以鎮於下。後以八味丸加五味鹿茸不時服之。○又一等火鬱之證。六脉俱濇。甚至沉伏。四肢悉寒。甚至厥逆。拂拂氣促而喘。知似有餘而脉不緊。數欲作陰虛。而按尺鼓指。此爲畜鬱已久。陽氣拂遏。不能營運於表。以致身冷脉微。而悶亂喘急。當此之時。不可以寒藥下之。又不可以熱藥投之。惟逍遙散合佐金丸之類。宣通蓄熱。得汗而愈。愈後仍以六味丸養陰和陽可也。

喻嘉言曰。喘病無不本於肺。惟兼三陰者爲最劇。而

三陰又以腎爲最劇。有此證者。首重在節慾收攝腎氣。不使上攻可也。故喘病兼少陰腎者爲最劇。腎火動則水氣升。其次則太陰脾。脾火動則濕氣升。又次則厥陰肝。肝火動則風氣升。是故治喘以治火爲先也。然濁氣旣隨火而升。火降而氣不降者何耶。以濁氣雖居於下。而肺之窠囊可以僑寓其中。轉使清氣逼處不安。是雖以火治爲先。然治火而不治痰。無益也。治痰而不治窠囊之痰。雖治與不治等也。惟薑汁竹瀝可以透窠囊耳。

李士材曰。內經論喘。其因衆多。究不越於火逆上而氣不降也。雖然。火則一。而虛實攸分。每見世俗一遇

喘家純行破氣於太過者當矣於不及者可乎。余嘗論證因虛而死者十九。因實而死者十一。治實者攻之卽効。無所難也。治虛者補之未必卽効。須悠久成功。其間轉折進退良非易也。故辯證不可不急。而辯喘證尤爲急也。巢氏嚴氏止言實喘。獨王海藏云。肺氣果盛則清肅下行。豈復爲喘。皆以火燥真氣氣衰則喘。所謂盛者非肺氣也。肺中之火也。斯言高出前古。惜乎但舉其端。未能縷悉。請得其詳而言之。氣虛而火入於肺者。補氣爲先。生脉散有痰。六君子湯陰虛而火乘金不得卧者。壯水爲急。六味丸虛則合生脉散。風寒者解其邪。華蓋散溼氣勝者利其水。滲溼

湯暑邪者，滌其煩，白虎湯。痰壅者，消其痰，二陳湯。氣
鬱者，疎其鬱，四七湯。肺脹者，散其邪，豚浮大者，越脾
加半夏湯。豚浮者，小青龍加石膏湯。腎虛火不歸源，
八味丸。腎虛水邪泛濫，濟生腎氣丸。此治喘之大法
也。

喘嗽氣從臍下衝上而尺脈洪盛，或數兼見盜汗潮
熱，屬陰虛。六味丸作湯，加補骨脂、五味子，送下靈砂
丹。誤用四磨必死。若作痰治亦危。○有因氣而喘者，
遇惱便發，脈必沉弦，此氣滯其痰也。蘇子降氣湯。若
但喘不嗽，不分遠近，前湯吞靈砂丹。○秋冬感寒，每
夜連嗽不絕，大喘至天明方緩，脇動痞悶者，麻黃蒼

術湯○肺虛受寒而喘參蘇溫肺湯○寒鬱熱邪而喘中有積痰遇冷卽發麻黃定喘湯○遠年欬逆上氣胸滿痞塞聲不出者人參定喘湯○虛冷上氣勞嗽喘乏千金用半夏一升人參生薑桂心甘草各一兩水煎分三次服○喘欬上氣不得卧生薑橘紅人參紫蘇各一錢五味數粒煎服○腎與肺胃俱虛喘嗽乏力人參一錢核桃肉三枚皮連蜜炙煎服神驗○腎氣上逆而喘用連皮核桃肉三枚生薑三片臨卧細嚼卽安○七情鬱結上氣喘急四磨湯四七湯選用○肥盛多痰喘不得休不能卧人扶而坐數日者十緡湯一服卽安或十緡湯合導痰湯尤妙然惟

元氣未衰者宜之。虛人未可輕試也。○喘而諸藥不
効，腹堅脉實者，神保丸、大便秘者勿用。○氣實人誤
服參芪而喘者，三拗湯瀉之。○但伏不得卧，欬逆上
氣，面目浮腫者，古今錄驗續命湯氣盛有餘，脉來滑
實者勿用。○經年喘嗽，遇寒更甚者，九寶湯寧嗽化
痰湯選用。○一切喘證，屬有餘者治之，即愈。若屬虛
證，誤與泄氣，禍不旋踵，即暴喘腹脹，大便秘者，方可
用藥。加以瀉泄，必死。勿治此陰火暴逆於手足大陰，
所以喘脹腎氣失守，所以便溏。其人雖強，不久當嘔
血而死。

診○脉宜浮遲，不宜急疾。喘逆上氣，脉數有熱，不得

卧者難治。上氣面目腫眉息脉浮大者危。上氣曲息
低昂脉滑手足温者生。脉濇手足寒者死。右寸沉實
而緊爲肺感邪。亦有六部俱伏者。宜發散。大抵喘屬
肺中。人盛脉浮滑者可治。若沉滑爲腎虛。陰火上升
難治。

短氣。○短氣者。一屬支飲。脉必弦滑。平人無寒熱冒
眩。短氣不足以息者。實也。金匱云。短氣有微飲。當從
小便去之。苓桂本甘湯主之。腎氣丸亦主之。仲景並
出二方。分呼吸之短而治。妙義益彰。呼氣之短。用苓
桂朮甘湯以通其陽。陽氣化。則小便能出矣。吸氣之
短。用腎氣丸以通其陰。腎氣通。則小便之關門利矣。

○又云欬逆倚息不得卧小青龍湯。脹滿者厚朴大

黃湯。

即小承氣湯

○一屬氣虛。東垣云。短氣者肺主諸氣。

五藏之氣皆不足而陽道不行也。氣短小便利者四

君子去茯苓加黃芪。如腹中氣不轉者倍甘草。肺氣

短促或不足者倍參加白芍。使肝胆之邪不敢犯之。

若失血後陰火上乘而短氣不足以息。或腎虛發熱。

唾痰者。生脉散加歸芪生地。○病後產後一切瘡疽。

潰後氣虛不能接續。及年高病久正氣耗散之人。雖

有痰火不可作有餘治。誤用耗氣之藥。禍不旋踵。須

大劑生脉散為君。少佐陳皮扶接元氣為主。

少氣。○少氣者氣少不足以言也。經曰。怯然少氣者。

是水道不行。形氣消索也。又曰。言而微。終日及復言者。此奪氣也。又云。氣虛者。言無常也。又云。脾脉搏堅而長。其色黃。當病少氣。其治法不離獨參湯。生脉散。保元湯。異功散之類。

逆氣。○經曰。人有逆氣不得卧。而息有音者。是陽明之逆也。足三陽下行。今逆而上行。故息有音也。陽明者。胃脉也。胃者六府之海。其氣亦下行。陽明逆不得從其道。故不得卧。而息有音也。夫起居如故。而息有音者。是肺之絡脉逆也。絡脉不得隨經上下。故留經而不行。絡脉之病人也。微故起居如故。而息有音也。夫不得卧。卧則喘者。是水氣之客也。夫水者。循津液

而流也。腎者水藏，主津液。主臥與喘也。若四磨湯、七氣湯，皆治陽明之氣逆；杏子湯、小青龍湯、越脾湯、蘇子降氣湯，皆治肺絡之氣逆；麻黃附子細辛湯，腎氣丸、靈砂丹，皆治腎氣之逆。

哮○哮喘證多屬寒包熱邪，所以遇寒即發。喉中水雞聲，有積痰在肺絡中，必用吐法以提散之，不可純用寒涼。當須兼帶辛散，小青龍湯探吐最妙。年高氣弱人忌吐。○凡喘未發時，以扶正氣為主；既發時，以散邪為主。○哮喘遇冷則發，其法有二：一屬中外皆寒，溫肺湯、鍾乳丸、冷哮丸選用，并以三建膏護肺俞穴最妙；一屬寒包熱，越脾加半夏湯、麻黃定喘湯表散。

其邪。平時用蘆吸散亦妙。古人治寒包熱邪。預於八
九月未寒之時。用滾痰丸下其熱痰。後至冬無熱可
入。則不發矣。○丹方治冷哮痰喘。用胡椒四十九粒
入活蝦蟇腹中。鹽泥煨存性。臥時分三次醇酒服之。
羸者諒分五七服。用之輒效。若有伏熱者。誤用喘逆
倍劇。不可不辯。○冷哮灸肺俞。膏肓。天突。有應有不
應。夏月三伏中。用白芥子塗法。往往獲效。方用白芥
子淨末一兩。延胡索一兩。甘遂細辛各半兩。共爲細
末。入麝香半錢。拌勻。薑汁調塗肺俞。膏肓。百勞等穴。
塗後麻瞽疼痛。切勿便去。候三炷香足。方可去之。十
日後塗一次。如此三次。病根去矣。○遇厚味則發者。

用萊菔子炒研一兩。猪牙皂炭燒存性三錢。共爲細末。薑汁調蒸餅爲丸。綠豆大。每服五十丸。沸湯或枳實湯下。名清金川。消其食積。則肺胃自清。仍當薄滋味。以清肺胃之氣。○傷風冷飲食而喘者。用白麴二錢。砂糖二錢。飴糖餅化汁。捻作餅子。爐內烘熟。剉出。加輕粉四錢。令患人食盡。吐出病根。卽愈。年幼兒體虛者。分三四次服之。蓋鹹哮肺胃受傷。白麴砂糖膠飴甘溫戀膈。使之留連病所。引領輕粉搜滌淤積之痰。上涌三涌。三補屢建奇功。補用異功五味稍加細辛服之。○醋噎而嗽。甘草二兩。中半劈開。用猪胆汁五枚浸五日。火炙爲末。蜜丸茶清吞二錢。臨臥服之。○

凡哮證見胸凸背駝者此肺絡敗爲痼疾不治
飛疇治韓順溪內子患喘證月餘服破氣寬胸豁
痰清火等藥不効發表利水亦不應其疾轉急稍
動則喘難休息診之六脉細數而面赤戴陽用大
劑六味地黃作湯加青鉛兩許一服而緩二服而
止